


滿清碑史

中



滿清稗史



北京市中国书店

清末實錄

●八月初八日諭慶親王奕劻奏爲職任重要精力難勝懇恩開去差缺一摺該親王雖年逾七旬精力尙健值此時會艱難百端待理又當憲政進行之際正賴老成碩望翊贊新猷該親王夙著公忠亦斷不能忘懷時局也所請開去內閣總理大臣管理外務部差缺著毋庸議○十九日諭端方等奏湖北境內粵漢川漢鐵路遵旨收歸國有取銷商辦公司並議定接收股款辦法一摺前因鐵路收歸國有曾經諭令督辦粵漢川漢鐵路大臣會同各該省督撫等將所有收款遵照五月二十一日諭旨分別辦理茲據奏稱鄂路股款約分四項官招粵漢商股川漢商股皆係實銀應卽欽遵諭旨一律發給國家鐵路股票不願附股者發還現銀其川漢彩票股與普通彩票不同早經按戶換給股票逐次付息擬懇一併按照商股辦法給與分利分紅股票至商招商股一項係零星勸集股東散處無從遍詢擬由該省鐵路協會

紳士自行清理先將股本一律退還其有願附股者再行繳銀領票以清界限此外尙有賑糶捐一款擬援湘省成案撥作地方公股官紳會商意見相同業於八月初六日接收完竣等語該大臣等辦理接收事宜暨所擬辦法均尙妥協湖廣總督瑞澂辦事明敏於此次路事尤能盡心籌畫不負委任該省士紳復能仰體朝廷德意率先遵辦洵屬深明大義著傳旨嘉獎該大臣等迅即會同度支部郵傳部按照籌擬各節分別清理刻期開工以重交通要政餘均照所議辦理該部知道○二十日清旨瑞澂電奏探知革黨潛匿武昌定期十九夜間起事正飭防拿旋據蔣耀珊電稱於漢口拿獲要匪劉耀璋一名起獲偽印偽示偽照會等多件遂與統制張彪等督派弁兵在省城內先後拿獲匪目匪黨三十二名並起獲軍火炸彈多件內有劉汝夔開槍拒捕楊宏勝私藏軍械彭楚藩語尤狂悖當將該三犯訊明正法等語該革匪在鄂創亂意圖大舉實屬目無法紀該督悞思初萌定亂俄傾辦理尙屬迅速在事文武亦皆奮勇可嘉除劉汝夔三犯業經正法外其餘已獲各匪即著嚴行研

鞠盡法懲治一面督飭地方文武嚴密查拿在逃各匪務獲究辦一面出示曉諭如有被脅勉從者准其首悔自新失察之巡警及地方文武既經隨同協拿出力均從寬免其置議在事出力各員並准擇尤酌保毋許冒濫餘著照所議辦理○二十一日諭瑞澂電奏十八夜革匪創亂拿獲各匪正在提訊核辦革匪餘黨勾結工程營輜重營突於十九夜八鐘響應工程營則猛撲楚望台軍械局輜重營則就營縱火斬關而入瑞澂督同張彪鐵忠王履康分派軍警隨時布置並親率警察隊抵禦無如匪分數路來攻其黨極衆其勢極猛瑞澂退登楚豫兵輪移往漢口已電調湘豫巡防隊來鄂會剿並請派大員多帶勁旅赴鄂剿辦等語覽奏殊深駭異此次兵匪勾通蓄謀已久乃瑞澂毫無防範預爲布置竟至禍機猝發省城失陷實屬辜恩溺職罪無可逭湖廣總督瑞徵著卽行革職帶罪圖功仍著暫署湖廣總督以觀後效卽責成該署督迅卽將省城刻期克復毋稍延緩倘日久無功定將該督從重治罪並著軍諮府陸軍部迅派陸軍兩鎮陸續開拔赴鄂剿辦一面由海軍部加派兵輪

飭薩鎮冰督率前進並飭程允和率長江水師卽日赴援陸軍大臣廕昌著督兵迅速前往所有湖北各軍及赴援軍隊均歸節制調遣並著瑞澂會同妥速籌辦務須及早撲滅毋令匪勢蔓延○二十二日諭瑞澂兩次電奏兵匪構變始末情形各等語張彪督練鄂軍已歷多年竟至兵匪勾結省城不守可見其平日訓練無方而事前既毫無防範臨時復漫無節制不能固結軍心竟敢倉皇棄營逃出實屬大千軍紀罪無可逭統制官提督張彪著卽行革職並著瑞澂責令迅速痛剿逆匪克復省城所有被脅兵士如非甘心從逆卽行設法收撫倘再畏葸觀望定當加等治罪現在廕昌所帶兵隊已於今日專車陸續進發到鄂後卽著瑞澂會同籌畫迅赴事機所請飭部籌撥餉項一節著度支部迅速籌撥○諭湖廣總督著袁世凱補授並督辦剿撫事宜四川總督著岑春煊補授並督辦剿撫事宜均著迅速赴任毋庸來京陛見該督等世受國恩當此事機緊迫自當力顧大局勉任其難毋得固辭以副委任俟袁世凱岑春煊到任後瑞澂趙爾豐再行交卸○二十三日諭袁世凱現簡授

湖廣總督所有該省軍隊暨各路援軍均歸該督節制調遣廕昌薩鎮冰所帶水陸各軍並著袁世凱會周調遣迅赴事機以期早日勘定○諭岑春煊現簡授四川總督所有該省軍隊暨各路援軍均歸該督節制調遣○二十四日諭王人文著撤去侍郎銜開去川滇邊務大臣趙爾豐著仍充川滇邊務大臣四川總督岑春煊未到任以前所有川中剿撫事宜仍著趙爾豐懷遵迭次諭旨督飭各軍迅速辦理不得意存諉卸致誤事機○二十五日前廣西兵備處總辦蔡鐸著派充陸軍第三十七協統領官陸軍步隊第七十四標統帶官曲同豐著派充陸軍第三十八協統領官並均賞給陸軍協都統銜○旨資政院奏恭報資政院召集情形遵章奏請開會一摺知道了○二十七日旨度支部奏試辦宣統四年全國預算繕表呈覽並瀝陳辦理情形一摺著內閣會議具奏○二十八日諭兩月以來四川湖北相繼肇亂均係匪黨潛謀不軌擾害治安朝廷向來政尚寬大凡屬國民無不一視同仁從無格外苛求之舉此次逆匪無端搆煽據城抗拒蹂躪地方以致無辜良民橫遭塗炭其爲

首作亂之人實屬罪大惡極自爲法所不容惟念迫於不得已之被脅兵民類皆情有可原不能不網開一面其有爲匪所逼身被裹脅者如早自拔來歸無論兵民均准予以自新不咎既往倘有殺賊立功擒縛匪黨以獻者並加以不次之賞如搜獲逆黨名冊立即銷燬毋得稍事株連致滋擾累川鄂兩部被擾地方猝遭此變固已荼毒不堪卽賊匪未到之處亦不免風鶴頻驚致有遷避流離之苦著蔭昌袁世凱岑春煊端方仰體朝廷德意沿途宣布妥爲撫輯並剴切曉諭軍民人等勿爲邪說所誘隨聲附和勿爲謠言所惑徒事張皇經此次申諭之後爾軍民人等當共曉然於是非之所在卽利害之所關務當各守本分以副朕靖亂愛民之意○諭袁世凱現已補授湖廣總督所有長江一帶水陸各軍均著暫歸該督節制調遣會同沿江各該督撫妥籌辦理○諭陸軍部會奏遵議各省綠營巡防隊擬請一律暫緩裁減一摺據稱裁減綠營巡防隊係顧全財政起見惟當此時局艱危綠營巡防隊可以輔陸軍巡警所不及等語所有宣統三年預算案內各省奏明礙難裁減之綠營巡

防隊均著免其裁減並四年預算除直隸江贛等省仍照奏准各案辦理外餘著一律暫免裁減○二十九日諭監國攝政王面奉隆裕皇太后懿旨近來南省迭被水災今年湖北又有匪黨作亂俯念飢民難民流離蕩析深爲憫惻亟宜加恩賑撫現將孝欽顯皇后所遺宮中內帑內撥銀二十萬兩由內務府發交袁世凱派妥委員在湖北一帶核實賑濟以惠災民○旨廕昌電奏督隊南下二十六日夜行抵信陽步隊第二十二標已由統帶馬繼增於二十四日抵漢口江岸遇匪徒兩次來攻均經擊退拿獲三名奪獲馬匹服裝等件混成第三協已由統領王占元於本日統率全軍抵漢口刻據探報逆匪仍據武漢尙無大股外竄武昌城內叛兵潰散頗多擬刊布告示令其繳械免罪以期解散行營現暫駐信陽俟混成第四鎮經過卽督率刻日前進等語布置尙合機宜均照所擬辦理仍著該大臣妥慎籌畫相機剿撫以期迅蕩匪氛

●九月初一日諭朕寅紹丕基於今三載勤求治理夙夜兢兢茲屆資政院第二次

開院之期爾議員等其敬聽朕命方今世界文明憲政尤爲當務之急自上年十月仰體先朝與民更新之意俯順內外臣工之請特降諭旨縮改於宣統五年開設議院並修改籌備事宜清單期限則年近一年籌畫乃日繁一日該院負國民之重望實協議之權輿前者已略具規模今茲當更有進步所有應議事項亟宜集衆思以廣益求一是以折衷以期漸有端倪日臻完備除上年該院未經議竣各案仍應接議外朕特命國務大臣將各項案件陸續籌擬照章交議爾議員等洞觀國勢熟審輿情其各體念時艱發摠忠愛總使法立而民不擾論定而事可行用以鞏固邦基弼成邦治朕有厚望焉將此特諭知之○諭旨本日資政院開院著派禮親王世鐸前往恭代行開院禮○資政院開院監國攝政王訓詞○溯自上年資政院開院以來已經匝歲凡關於憲政事項本監國攝政王與王大臣等悉心籌畫日促進行昕夕從事惟恐不及現又屆該院第二次開會之期各議員等學問日進閱歷較深凡國家安危所繫與吾民休戚所關以及一切事實理論自當研究漸精抉擇愈審必

能出所蘊蓄共矢虛公協贊謀猷代宣民隱上副朝廷孜孜求治之至意各議員其交勉焉○初三日懿旨今年各省水災甚多其被災尤重之直隸吉林江蘇安徽山東浙江湖南廣東各省垂念殊深著每省撥出宮中內帑銀三萬兩由內務府發交該督撫派委委員核實散放以賑飢民○初五日隆裕皇太后懿旨現在設立慈善救濟會著賞宮中內帑銀三萬兩以資拯濟○諭資政院奏部臣違法侵權激生變亂據實糾參一摺據稱禍亂之源皆郵傳大臣盛宣懷欺朦朝廷違法斂怨有以致之該大臣手握交通機關不惜專愎擅權隔絕上下之情於應交院協議交閣議決之案一切不顧於閣制發表之後二日首先破壞單銜入奏罔上欺民塗附政策釀成禍階此次川亂之起大半原因卽以該部奏定僅給實用工料之款以國家保利股票不能與鄂路商股一律照本發還又將施典章所虧倒數百萬棄置不顧怨苦鬱結上下爭持川亂卽作人心浮動革黨叛軍乘機竊發該大臣實爲誤國首惡等語鐵路國有朝廷體恤商民政策乃盛宣懷不能仰承德意辦理諸多不善盛宣懷

受國厚恩竟敢違法行私貽誤大局實屬辜恩溺職郵傳大臣盛宣懷著卽行革職永不叙用內閣總理大臣慶親王奕劻協理大臣大學士那桐徐世昌於盛宣懷朦混具奏時率行署名亦有不合著交該衙門議處嗣後該大臣等於一切用人行政事宜務當不避嫌怨竭誠贊畫以維大局而濟時政○諭郵傳大臣著唐紹怡補授迅速來京供職未到任以前著吳郁生暫行兼署○諭前派端方前往四川查辦鐵路事宜嗣據都察院代奏四川京官曾鑑等爲川民爭路致釀重案懇飭秉公查辦以維大局而遏亂源呈一件又經諭令端方按照所陳各節秉公查明具奏茲據端方電奏稱行抵川境迭據各屬士紳代表呈訴並先後接據委員報告及所聞官紳議論詳加考核查得川中罷市罷課不戢官吏不劫倉庫絕非逆黨勾結爲亂其七月十五日民居失火僅係南打金街民人自行失慎人民因蒲殿俊羅綸等被拘赴轅請釋統領田徵葵擅行槍斃街正商民數十人附近居民聞知遂首裹白巾奔赴城下求情又爲槍斃數十人以致衆情憤激其所傳布之自保商權書並無獨立字

樣亦無保路同志會及股東會圖記其中且有皇基萬世等語並非出自蒲羅等之手又有搜獲之本牌血書皆匪徒假託非士人所爲川中官吏周善培王掾饒鳳璫等復挾諮議局糾舉之嫌構成冤獄不納捐糧一說係官紳聯合會內提倡有緩辦捐輸以請息扣糧之議並非股東實行征收國家租稅等語此次川事糜爛既據端方查明實由官民交閔而成所有辦理不善之地方官自應分別懲治前護四川總督王文韶署四川總督趙爾豐身任封圻旣不能裁制於前復不能弭患於後實屬咎無可辭王人文趙爾豐均著交內閣議處署松潘鎮總兵營務處總辦候補道田徵葵貪功妄舉擅斃平民著卽行革職發往巴藏責令戴罪圖功署提法使勸業道周善培輕躁喜事變詐無常候補道王掾王梓結怨紳商聲名素劣均著卽行革職候補道饒鳳璫資輕望淺輿論不孚著以同知降補以昭炯戒四川諮議局議長法部主事蒲殿俊副議長舉人羅綸度支部主事鄧孝可翰林院編修顏楷貢生張瀾民政部主事胡燏舉人江三乘葉秉誠王銘新對於匪事絕無干涉均著卽行釋

放法部主事蕭湘前被拘留著一併免其置議現在川省土匪竊發蹂躪地方煽脅良民蔓延日久著端方傳旨責成蒲殿俊等分投開導迅速解散不得藉詞諉卸其有抗拒不服甘心作亂之匪徒仍著端方趙爾豐嚴飭地方文武切實剿辦總使良莠分明毋枉毋縱以副朝廷綏靖地方之至意餘照所議辦理該衙門知道○諭昨據盛宣懷奏設立慈善救濟會派員赴鄂救濟被難人民一摺此次湖北變亂武漢居民同遭慘禍現既不得已而用兵凡軍前之受傷被難軍民其困苦尤堪憫念著卽設立慈善救濟會盛宣懷現已革職著尙書呂海寰妥速籌辦并督飭派往各員於醫傷救難兩事認真救濟又片奏派令沈敦和福開森前往辦理救濟事宜又片奏在京設立會所選派得力人員隨同規畫各等語均著呂海寰酌核辦理該衙門知道○初六日諭監國攝政王面奉隆裕皇太后懿旨現在湖北用兵軍需浩繁著撥出宮中內帑銀一百萬兩由內務府發交度支部專作軍中兵餉之用○諭湖廣總督袁世凱授爲欽差大臣所有赴援之海陸各軍並長江水師暨此次派出各項

軍隊均歸該大臣節制調遣其應會同鄰省督撫者隨時會同籌辦凡關於該省剿撫事宜由袁世凱相機因應妥速辦理軍情瞬息萬變此次湖北軍務軍諮府陸軍部不爲遙制以一事權而期迅奏成功○諭陸軍大臣蔭昌部務繁重勢難在外久留著卽將第一軍交馮國璋統率俟袁世凱到後蔭昌再行回京供職○諭馮國璋著總統第一軍段祺瑞著總統第二軍均歸袁世凱節制調遣○諭張鳴岐電奏新任廣州將軍鳳山由滬來粵初四日辰刻登岸行至南門外突有炸彈轟發轟倒道旁民屋牆壁鳳山所乘肩輿亦被摧壓隨經將火撲滅搜出鳳山屍身懇恩賜卹等語廣州將軍鳳山由京旗章京洊升副都統都統訓練近畿各鎮簡任荊州將軍調補廣州將軍宣力有年克勤厥職茲因赴任甫經到粵猝遭慘害深堪憫惻著加恩予諡追贈太子少保銜照將軍陣亡例從優議卹任內一切處分悉予開復應得卹典該衙門查例具奏靈柩回旗時沿途地方官妥爲照料准其入城治喪並着該旗將該將軍子嗣查明具奏候旨施恩○旨廣州將軍著春祿補授○旨廣州漢軍副

都統著恩澤補授未到任以前著文泰兼署○旨袁世凱電奏起程日期知道了著卽妥籌布置迅赴事機○初七日旨都察院代遞四川同鄉京官宋育仁等爲川鄂變亂關係全局請酌籌兵餉等情呈一件前已有旨著岑春煊除帶粵軍兩營外准其添募八營並由度支部籌撥餉銀一百萬兩○初八日諭湖北省城亂事初起瑞澂身任總督棄城逃走避登兵輪當將該督革職諭令帶罪圖功並諭令袁世凱查其當日棄城情形再行辦理茲忽接據瑞澂電奏因兵艦煤盡而至九江因九江兵變而至上海等語該革督竟不遵旨帶罪圖功乃敢潛逃出省辜負朕恩偷生喪恥官堪痛恨何能再予姑容著張人駿迅卽派員將瑞澂拿解來京交法部嚴訊治罪其帶出之湖廣總督卽信並著張人駿派員收取資送袁世凱軍營○初九日諭朕續承大統於今三載兢兢業業期與士庶同登上理而用人無方施治寡術政地多用親貴則顯戾憲章路事朦於僉壬則動違輿論促行新治而官紳或藉爲網利之圖更改舊制而權豪或祇爲自便之計民財之取已多而未辦一利民之事司法之

詔屢下而實無一守法之人馴致怨積於下而朕不知禍迫於前而朕不覺川亂首
發鄂亂繼之今則陝湘警報迭聞廣贛變端又見區夏騰沸人心動搖九廟神靈不
安歆饗無限蒸庶塗炭可虞此皆朕一人之咎也茲特布告天下誓與我國軍民維
新更始實行憲政凡法制之損益利病之興革皆博采輿論定其從違以前舊制舊
法有不合於憲法者悉皆除罷化除旗漢屢奉先朝諭旨務即實行鄂湘亂事雖涉
軍隊實由瑞澂等乖於撫馭激變棄軍與無端搆亂者不同朕惟自咎用瑞澂之不
宜軍民何罪果能幡然歸正決不追咎既往朕以眇眇之躬立於臣民之上禍變至
此幾使列聖之偉烈貽謀顛墜於地悼心失圖悔其何及尙賴國民扶持軍人翼戴
期納我億兆生靈之幸福而鞏我萬世一系之皇基使憲政成立因亂而圖存轉危
而爲安端恃全國軍民之忠誠朕實嘉賴於無窮此時財政外交困難已極我君民
同心一德猶懼顛危倘我人民不顧大局輕聽匪徒煽惑致釀滔天之禍我中國前
途更復何堪設想朕深憂極慮夙夜旁皇惟望天下臣民共喻此意將此通諭知之